

Santésuisse: Unitad dat forza

Radunanza generala a Berna

■ (anr/ld) **A la radunanza generala da Santésuisse ha il president punctuà la muntada da l'unitad da la federaziun interprofessionala. Stefan Felder da Basilea ha cumpareglià noss sistem da sanadad cun auters pajais.** A chaschun da la radunanza generala da Santésuisse a Berna ha appellà il president *Christoffel Brändli* las organisaziuns da las cassas da malsauns a l'unitad. Mo in agir communabel dettia forza e possia avair success er en l'avegnir. Quest cumporment saja tant pli necessari en vista a las difficultads actualas da contrahar cun ils acturs da la sanadad publica. Brändli vul augmentar la preschientscha da Santésuisse sin il palancà politic e rinforzar l'atgna posiziun. Mo sin quella moda possia l'organisaziun contractar cun success cun las organisaziuns dals medis e dals ospitals e defender noss sistem da sanadad innovativ e liberal.

Cumparegliaziun sur cunfins

Stefan Felder da l'Universitad da Basilea ha cumpareglià noss sistem da la sanadad publica cun la situaziun en la Germania ed en l'Ollanda e fatg ponderaziuns davart la regulaziun d'in sistem da concurrenza. Felder ha constatà ch'ils custs per la sanadad publica



Christoffel Brändli, il president da Santésuisse, vul dapli influenza sin il sector politic.

FOTO L. DEPLAZES

Santésuisse

Santésuisse è l'uniun professiunala da las cassas da malsauns svizras. La federaziun represchenta ils interess da ses commembers envers las autoritads federalas e chantunalas. Santésuisse promova en la politica ed en la publicitad la chapientscha per las dumondas da la sanadad.

Tarifsuisse, sia «figlia», surveglia il svilup dals custs e contractescha cun ils chantuns e cun ils purschiders davart las tariffas, las prestaziuns e la qualitat.

L'ultim temp han in pèr commembers bandunà Santésuisse e fundà ina atgna organisaziun.

hajan cuntanschi en la Germania (11,6%), en l'Ollanda (12%), en l'Engalterra (9,6%) il medem nivel sco en Svizra cun 11,4% dal product naziunal brut. En cumparegliaziun cun l'onn 1970 munta quai en tut ils pajais numnads almain ina dublegiada dals custs per la sanadad. Quai che appartegna las premias èsi difficil da cumparegliar perquai che las subvenziuns dal maun public èn differentas. En Svizra sustegnan confederaziun e chantuns famiglias e singulas personas en relaziuns finanzialas modestas cun 4 milliardas francs l'onn. Felder ha calculà las premias en Svizra sin 380 francs il mais

per persuna ed en la Germania sin 420 euros.

Dapi ils onns otganta hajan ils acturs mess dapli paisa sin la concurrenza e sin la qualitat da la medischiuna. Felder ha numnà diversas cundiziuns per garantir ina situaziun da concurrenza e constatà ch'en general manchian la trasparenza necessaria e la voluntad da divers acturs da procurar per l'infurmaziun dals pazients. In ulteriur motiv che impedeschia la vairra concurrenza saja la mancanza da la libertad da contractar e da fixar a moda individuala e selectiva ils pretschs, la qualitat e las prestaziuns.